

海源閣叢書

海源閣叢書

助字辨略卷二目錄

下平聲

先

前

然

焉

旃

偏

全

懸

緣

旋

專

韻刺通

連

聊

阜

饒

交

何

多

佗

它同俗作他

俄

蛾通

那

麼

和

邪

些

娑

加

嗟

遐

瑕霞通

夏

方

當

將 長 相 剛 更 誠 平 生 成

常 嘗 强 羌 行 羸 情 爭 并

甯
馨附

應

仍

登

曾

能

恆

勝

尤

猶
猷同

由

攸

疇

休

侯

尋

臨

今深兼僉

任堪咸凡

助字辨略卷二

確山劉洪武仲

先 漢書食貨志先是十餘歲河浹灌梁楚地固已數
困先是追原之辭也史記平準書作初先是往十餘
歲河浹觀梁楚之地固已數困初先是者重言也往
亦先是之辭此以四字爲重言者也

前 漢書高帝紀前陳王項梁皆敗不如更遣長者前
猶云先是也

然 漢書高帝紀呂后問曰陛下百歲後蕭相國旣死

誰令代之上曰曹參可問其次曰王陵可然少戇陳平可以助之陳平知有餘然難獨任周勃重厚少文然安劉氏者必勃也諸然字竝轉語也又禮記祭義君子之所謂孝也者國人稱願然曰幸哉有子如此所謂孝也已鄭注云然猶而也漢書張良傳漢王乃遣隨何說九江王布而使人連彭越及魏王豹反使韓信特將北擊之因舉燕代齊趙然卒破楚者此三人力也此然字亦而辭也又孟子無若宋人然又云使民盼盼然此然字猶如也又楚辭九章固朕形之

不服兮然容與而狐疑宋玉九辨然中路而迷惑兮
自厭按而學誦又云忠昭昭而願見兮然露晷而莫
達又云被荷裋之晏晏兮然潢洋而不可帶此然字
發語辭也今陳蔡閒發語猶云然完也又書盤庚用
懷爾然蔡注云用懷念爾故也又詩國風胡然我念
之大雅無然畔援無然歆羨荀子正名篇五官以簿
之而不知心徵之而無說則人莫不然謂之不知解
蔽篇強鉗而利口厚顏而忍詬無正而恣睢妄辨而
幾利不好辭讓不敬禮節而好相推擠此亂世姦人

之說也則天下之治說者方多然矣史記游俠傳此
皆學士所謂有道仁人也猶然遭此蓄漢書司馬相
如傳若然辭之是泰山靡記而梁父罔幾也諸然字
竝語助辭不爲義者也又禮記檀弓歲旱穆公召縣
子而問然鄭注云然之言焉也又論語雍之言然正
義云然猶是也史記孔子世家孔子欣然笑曰形狀
未也而似喪家之狗然哉然哉重言然哉者深以爲
是也又難經一難曰十二經皆有動脈獨取寸口以
洩五藏六府死生吉凶之法何謂也然寸口者脈之

大會手太陰之脈動也二難曰脈有尺寸何謂也然
尺寸者脈之大要會也滑伯仁注云然荅辭愚案此
然字應問者之聲旣先荅之後乃剖其是非不爲義
者也如孟子時子因陳子以告孟子陳子以時子之
言告孟子孟子曰然亦是先荅而後語其不可也又
孟子然後敢入又云予然後浩然有歸志然後爲也
繼事之辭也又漢書萬石君傳子孫有過失不誚讓
爲便坐對案不食然後諸子相責因長老肉袒固謝
罪改之乃許此然後亦是乃辭然與上意有別上云

因其如此方敢入方有歸志其辭緩此云見其如此
遂相責謝罪其辭急乃字原有兩訓故然後亦兼二
義也又後漢書朱穆傳然知薄者之不足厚者之有
餘也此然字猶云然後省文也又韓退之論淮西事
宜狀事至不惑然可圖功又云兵之勝負實在賞罰
賞厚可令廉士動心罰重可令凶人喪魄然可集事
又云待其稍能緝綏然擬許其承繼論變鹽法事宜
狀州縣和雇車牛百姓必無情願事須差配然付腳
錢諸然字竝是然後疑當時方言如此故文移皆省

去後字也。文史記律書因其欲然能不擾亂此然字。猶云如是也。又詩關雎序然則關雎麟趾之化王者之風故繫之周公正義曰然者然上語則者則下事。因前起後之勢也。愚案如孟子然則小固不可以敵大。左傳哀公十七年武伯問于高柴曰諸侯盟誰執牛耳。季荏曰鄆衍之役吳公子姑曹發陽之役衛石魋武伯曰然則彘也。凡言然則皆承上語以發下意。然者如是也。旣如是則當云何故云然則也。又周語上得民心以殖義方是以作無不濟求無不獲然則

能樂此此然則猶云然後又禮記學記夫然故安其
學而親其師樂其友而信其道夫然猶云夫如是承
上之辭也又論語不然獲罪于天無所禱也不然者
否也猶云不如此此辭之洩也又左傳僖公二十三
年凡諸侯同盟死則赴以名禮也赴以名則亦書之
不然則否辟不敏也不然則否者言若不赴以名則
亦不書名此不然意在兩可與洩辭別也又左傳成
公十八年若楚人與吾同惡以德於我吾固事之也
不敢貳矣大國無厭鄙我猶憾不然而收吾憎使贊

其政以閒吾覺亦吾患也史記吳世家歌唐曰思深
哉其有陶唐氏之遺風乎不然何憂之遠也此不然
反設之辭辭之頓挫者也與上義又別又荀子哀公
篇哀公曰然則夫章甫綯履紳而搢笏者此賢乎孔
子對曰不必然不必然猶云不盡然也又論語子曰
其然豈其然乎其然未信之辭也又左傳襄公二十
三年他日又訪焉對曰其然將具敝車而行杜注云
其然猶必然愚案此與上其然義別又史記魏世家
王曰以孟嘗芒卯之賢率強韓魏以攻秦猶無柰寡

人何也今以無能之如耳魏齊而率弱韓魏以伐秦
其無柰寡人何亦明矣左右皆曰甚然甚然者深贊
之猶云大是也又韓退之論淮西事宜狀自然相率
棄逆歸順黃家賊事宜狀處理得宜自然永無侵叛
之事自然者無所勉強之辭也又世說謝太傅語王
右軍曰中年傷于哀樂與親友別輒作數日惡主曰
年在桑榆自然至此此自然應合之辭也又史記范
雎傳意者臣愚而不概于王心邪亡其言臣者賤而
不可用乎自非然者臣願得少賜游觀之間望見顏